

क्रिसमस दी कहाणी

“परमेसरे संसारे नैं इतना पिआर कित्ता भई तिहना अपणा इकलौता पुतर देई दित्ता तांजे जेहड़ा कोई तिस पर बसुआस करे सैह नास नी होए अपर अनंत जीवन पाए।”

मुक्तीदात्ते दा जनम कने संदेस

परमेसर सैह हन जिहनां असां सारेआं जो कने दुनियां दिआ हरेक चीज्जा जो बणाया है। तिहनां माहणुए जो इस ताई बणाया, तांजे तिहनां दा कने माहणुआं दा अप्पू च निजी सबंहद बणेआ सैह। अपर पाप्पे दे रस्ते च चलणे दिआ बहजा ते लोक अप्पू ई परमेसरे ते दूर होई गै। परमेसर पबित्तर कने धरमी हन, इस ताई पाप्पे कन्ने तिहनां दा कोई भी सबंहद नी हुंदा है। परमेसरें कई ज्हार साल पैहलैं एह योजना बणाई भई असां जो पाप्पां ते मुक्ती दुआणे ताई कने नरके ते बचाणे ताई तिहना अपणे पुत्तरे जो घलणा है। तिहना माहणुए दे रूपे च जनम लई नैं मुक्ती देणे ताई बलिदान होणा है। सारेआं तिहना जो 'मसीह' करी नैं जाणना है। यीशु होरां ई सैह 'मसीह' हन, जेहड़े पबित्तर, नरदोस कने परमेसरे दे पुत्तर हन।

प्रभु यीशु दे जनम दी भबिस्याबाणी

अज्जे ते तकरीबन तिन ज्हार साल पैहलैं इसराइल देस्से च दाऊद नांए दा इक राजा राज करदा था। सैह परमेसरे दा बड़ा भग्त था कने परमेसर तिस ते बड़े खुस थे। इस ताई तिहनां तिस कन्ने बाहइदा कित्ता भई तिस दे बंस्से दा राज सहदा ताई बणेआ सैहणा है। कने तिहनां दिनां च कई नबी भबिस्याबाणी भी करदे थे भई तिस ई राजे दे बंस्से ते इक मुक्तीदाता नैं जन्म लैणा है कने सारेआं तिहना जो 'मसीह' मनणा है।

इहनां बिच्चा ते इक्की ता एह भी भबिस्याबाणी कित्तिओ थी भई तिहना दा जनम इक्की कुआरिआ बिट्टिआ ते ई होणा है। इहनां इस बंस्से दा राज चार सौ सालां तिकर चलदा रेहआ। अपर कुछ अधरमी राजेआं दिआ बहजा ते इसराइली लोक गलामिआ च पई गै। गलाम होई नैं तिस देस्से दे लोक बड़े परेसान कने दुखी होई गैहओ थे। सैह तिस 'मसीह' दे औणे दे इंतजारे च थे, जिहना तिहनां जो गलामिआ ते छड़ाणा था। अपर छींह सौ सालां तिकर दाऊदे दा राज खाली ई पेई रेहआ।

सुअर्गदूत्ते दा मरिअम जो दरसन

तिस देस्से च 'नासरत' नांए दा इक छोट्टा देहआ ग्रं था। तिहत्थु 'मरिअम' नाएं दी इक बिट्टी रेंहदी थी। तिसा दी मंगणी 'यूसुफ' नाएं दे इक्की माहणुए कन्ने होइओ थी। इक दिन क्या होया भई परमेसरें अपणे दूत्ते जो तिसा बहला घल्लेआ। सुअर्गदूत्तें परगट होई नैं तिसा जो नमस्कार करी नैं ग्लाय, "परमेसर तिज्जो सौगी हन कने तिहना दी तिज्जो पर बड़ी दया होई है!"

एह सुणी नैं मरिअम घबराई गई कने सोचणा लग्गी भई इस दे ग्लाने दा क्या मतलब होई सकदा!?" तां सुअर्गदूत्तें ग्लाय, "डरें मत! दिख, तैं गर्भवती होणा है कने तिज्जो ते इक पुत्तर जमणा है।" एह सुणी नैं सैह होर भी परेसान होई गई। तिन्ने ग्लाय, "एह किंहां होई सकदा!? मैं ता हाल्ली कुआरी है।" ता सुअर्गदूत्तें ग्लाय, "दिख! परमेसरे ताई कुछ भी मुसकल नी है। पबितर आत्मा दिआ समर्था ते तू गर्भवती होणा है कने दिख जेहड़ा जे पुतर तिज्जो ते जमणा है तिसदा नां तू 'यीशु' रखेआं।" तिन्नी एह भी ग्लाय भई सैह पुतर बड़ा ई पबितर कने म्हांन होणा है। सैह परमेसरे दा पुतर मन्नेआ जाणा है कने तिन्नी दाऊदे दे राज्जे दा बारस होणा है। ता मरिअममें ग्लाय, "मैं परमेसरे दी भग्तण है कने जे किछ परमेसर चांहदे हन तिहनां ई तिहना दी मरजी पूरी होए। एह ग्लाय नैं सुअर्गदूत तिहत्थु ते चला गेआ। मरियम सोचा च पई गई।"

यूसुफे दा सुपना

जाहलु यूसुफे जो पता लग्गा भई मरिअम दे पैर भारी हन तां तिसदेआं ता जिहआं जे पैरां हेठा ते जमीन ई खिसकी गई होए । सैह सोचणा लग्गा भई मरिअम साहई नेक कने भल्लिआ बिट्टिआ कने देहआ होएआ किहआं हुंगा ? जे मैं किछ करां या ग्लां तां तिसा दी बदनामी हुंदी है । कनैं मैं नी चांहदा भई तिसा दी बदनामी होए । हुण मैं करां ता क्या करां ! बडा सोच-बचार करी नैं तिन्नी तिसा कन्ने डोल ई मंगणी तोड़ी देणे दा मन बणाई लेआ । सोचदेआं-सोचदेआं तिसजो निंदर पेई गई ।

निंदरा च इक सुअर्गदूत तिस बहला आई नैं खडोई गेआ कने ग्लाणा लग्गा, “दाऊद राजे दे बंसज यूसुफ ! तू कजो परेसान है । डरैं मत मरिअम दिआ कोकखा च जेहडा बच्चा है सैह परमेसरे दिआ पबितर आत्मा दिआ समर्था ते है । आद कर ! नबिएं पबितर-सासतरे च क्या ग्लाय़ा ? एह ई न भई इक कुआरी गर्भवती होणी है कने तिसा ते इक पुतर जमणा है । एह सैहओ भबिस्याबाणी ई ता पूरी होआ दी है । इस करी नैं तू मरिअम नैं बिआह करने ते मत डरैं । तिसा ते जेहडा पुतर जमणा है तिसदा नां तू यीशु रखेआं।”

इतणे च ई यूसुफे दी हाख खुहली गई । कने सैह इस दरसणे दे बारे च सोचणा लग्गा । सैह सुअर्गदूते दी गल्ल मन्नी करी मरिअम जो बिहाई नैं घरेओ लई आएआ । कने जाहलु तिकर बच्चा जम्मी नी पेआ ताहलु तिकर मरिआदा दा पालन करदा रेहआ ।

यीशु होरां दा जनम

तिहना दिनां च रोम्मी म्हााराजैं हुकम दिता भई सारे देस्से देआं लोकां दी गिणती किती जाए । इस करी नैं लोक अपणा-अपणा नां दरज करणे तांई अपने पुरखां दे नगरां जो जाणा लग्गे । कने यूसुफे जो भी अपने पुरख दाऊदे दे नगरे जो जाणा पौणा था । अपर सैह सोचणा लग्गा भई इसा हालता च मरिअम जो किहआं लई नैं जांहगा ? बैतलैहम ता इहत्थु ते बड़ी दूर है । फिरी भी सैह दोहयो हिम्मत करी नैं तिहत्थु जो चली पै । बैतलैहम पुज्जी नैं सैह अप्पू तांई ठकाणा तोपणा लग्गे । तिहत्थु नां लखाणैं तांई मते भारी लोक आहएओ थे । इस करी नैं तिहना जो रैहणे तांई कुत्थी भी जग्गा नी मिल्ली कने तिस ई बग्तैं मरिअम दे बच्चे जनणैं दा बग्त होई गेआ । आखरे च सैह इक्की सरांए जो गै, तिहत्थु भी कोई जग्गा नी थी कने तिहना जो तिसा सरांए दिआ घराला च ई रैहणा पेआ । तिहत्थु प्रभु यीशु मसीह दा जनम होएआ ।

सुअर्गदूते दा गुआलुआं जो दरसन

तिहत्थु कुछ गुआलु रात्ती बाहर रही नैं अपने ध्रणे दा पैहरा देआ करदे थे । सैह अग्गी तप्पा दे थे ता चानक तिहत्थु बड़ी भारी लौ चमकी कने इक सुअर्गदूत परगट होएआ । ता गुआलु बड़े डरी गै । अपर सुअर्गदूतैं ग्लाय़ा, “डरा मत ! मैं तुसां जो इक खुसखबरी सणादा ! अज्ज दाऊदे दे नगरे च इक मुक्तिदाता होरां ने जनम लेआ है । कने तिहना दी एह नसाणी होणी है, तिहना तुसां जो इक्की घराला अंहदर कपड़े च लपेहटेओ कने खुरलिआ च रहखेओ मिलणा है । फिरी तिहत्थु होर भी सुअर्गदूत आई नैं परमेसरे दी जै-जै कार करना लग्गी पै ।

जाहलु सुअर्गदूत तिहत्थु ते चले गै, ता गुआलु अप्पू च सलाह करी नैं बैहतलैम्मे जो गै । तां जिहआं सुअर्गदूतैं तिहना जो दहसेआ था सहब तिहआं ई दिक्खेआ ।

सिमोने दा असीरबाद देना

चाहिलआं दिनां परंत मरिअम कनैं यूसुफ रीतिआ मुजब जागते जो लई नैं यरुसलम्मैं दे पराथना घरे जो गै । यरुसलम्मै च सिमौन नांए दा इक माहणु रैहंदा था । सैह बडा धरमी कने परमेसरे दा डर मनणे बाला था । पबितर आत्मैं तिसजो दहसेआ था भई मुक्तिदाते दे दरसण करने ते पैहलैं तिसदी मौत नी होणी है । तिस बग्तैं पबितर आत्मा दे दसणे मताबक सैह परमेसरे दे पराथना घरे जो गेआ ।

जाहलु सैह तिहत्थु पूज्जेआ ता मरिअम कने यूसुफ जागते जो पराथना दे घरे अंहदर लई नैं आएओ थे । सिमौन बच्चे जो दिक्खी नैं बड़ा खुस होएआ । तिन्नी जागते जो अपने मूडें लई नैं परमेसरे दा धनबाद किता कने तिसजो असीरबाद दित्ता । कने ग्लाणा लग्गा, “हे परमेसर ! मैं अपने मुक्तिदाते दे दरसन करी लै । हुण मैं सांतिआ नैं संसारे जो छड़ी सकदा है ।

नछतरां जो जाणने बाले गिआनिआं दा औणा

जाहलु यीशु होरां दा जन्म होएआ ता तिस देस्से च हेरोदेस राजे दा राज हुंदा था । कुछ नछतरां जाणने बाले गिआनिआं तिसते आई नैं पुच्छेआ, “तिस म्हान बच्चे दा जन्म कुथु होएआ जिन्नी यहूदिआं दा राजा बणना है ? कजोकि असां अंबरे च इक नौखा तारा दिक्खेआ है, जिसते असां जो तिस म्हान राजे दे जन्में दे बारे च गिआन मिल्ला है । असां तिस राजे दे दरसन करने ताई आहएओ हन ।”

इसा गल्ला सुणी नैं राजा बड़ा घबराहई गेआ । तिन्नी सारे पुजिआलेआं कने सासतरिआं जो सद्देआ कने तिहना ते पुच्छेआ भई राजे दा जन्म कुथु होणा चाहइदा ? तिहना जबाब दित्ता, “धरम सासतरे च ता लिहखेआ है भई ‘मसीह’ दा जन्म बैहतलैम्मैं च ई होणा है ।”

फिरी तिन्नी नछतरां जाणने बालेआं जो सद्दी नैं पुछ-मंग किती भई सैह तारा तिहना काहलु दिक्खेआ था । फिरी ग्लाणा लग्गा, अच्छा ! तुसां जा, कने तिस जागते दा ठीक-ठीक पता करा कने हटी नैं मिंजो भी दहसन्यो तांजे मैं भी तिस राजा बालक दे दरसन करी सकां ।

सैह तिस तारे दिएं सेहदीं-सेहदीं चली पै । कने तारा तिहत्थु जाई नैं रुकी गेआ जिहत्थु सैह बच्चा था । बच्चे जो दिक्खी नैं तिहना तिस दे पैर बंदे कने बड़िआं कीमती चीजां भेंट कितीआं । परमेसरें तिहना जो सुपने च एह चतौणी दिती भई हटी नैं हेरोदेस राजे बहला मत जांदे । इस ताई सैह तिहत्थु ते दूज्जे रस्ते होई नैं अपने-अपने देस्से जो चले गै ।

फिरी परमेसरें यूसुफे जो भी सुपने च चतौणी देई नैं ग्लाया भई बच्चे कने तिसदिआ माऊ जो लई नैं मिसर देस्से जो चला जाह । कजोकि हेरोदेस राजा बच्चे जो मारने दी सोचा दा है । सैह तिहत्थु ते चले गै कने हेरोदेस्से दे मरने तिकर मिसर देस्से च ई रह । कुछ दिनां बाहद परमेसरे दे दूतैं यूसुफे जो दरसन देई नैं ग्लाया, “उठ ! बच्चे कने तिसदिआ माऊ जो लई नैं हुण तू इसराइल देस्से दे नासरत नगरे जो चला जाह ।” फिरी सैह बच्चा नासरत नगरे च पलेआ-बहदेआ कने सैह बुहदिआ कने कद-काट्टे च कने परमेसरे दिआ समरथा कने माहणुआं दे प्यारे च बड़ा हुंदा गेआ । अज्ज सारा संसार तिहना जो मुकतीदाता प्रभु यीशु मसीह दे नांए ते जाणदा है ।

प्रभु यीशु मसीह दे जीवन, नौखेआं कम्मां कने मुकती दे संदेस्से दे बारे च पहड़ा कांगडिआ च मरकुसे दी कताब ।

इस पते पर :

पहाड़ी मसीह साहित्या संस्था,

पालमपुर (हिमाचल-परदेस) 176061

पोस्ट बॉक्स न० 58

ई-मेल...kangri.pmss@gmail.com